

Mon Onc' Michel !

J'a pon souvenance qu'in parlo d'invironemint din l'temps. In parlo ed ché bos, d'ché gardins, d'nou semalles, d'nou récoltes... In dijo à ché gosses dé n'point gacher, ed faire attention, d'éte polis...

Pi, in leu dijo aussi dé ne rien jejtter par terre, ed tout façon in avo pas grand kose à jejtter, vu qu'des eballaches y n'avo pa pou ainsi dir'.

Tout cha pou dir qu'chéto pas comme asteur.

Mi, kan j'éto gosse, j'min rappelle (in 1957 par là) kan in allo faire « nou comission » surtout pou ch'el grosse – in s'essuyo aveuc du papier journal, tout l'monde y féjo parel ; amon ma tante Thérèse chéto in tit peu pu doux, in avo du papier ed'soie ki véno d'ché imbalages d'el' vaisselle qu'al vindo.

Là, j'va vou raconter kekose ki va vou faire comprind' ke l'temps y passe mais kin arvient toudis au même. L'aut jour, in parlant aveuc chl'ambulancier ki nou ameno à l'cité hospitalière ed Lille, mi pis m'fille, y rm'acont e ky à six mos y travailo cor din ene maison d'retraite. Y n'pouvo faire sin travaill comme y auro eu ker d'l faire : pou li, in n'preno pas assez soin ed ché viux. Y n'a marre, y va vir ech directeur, y li dit el fond d'es pinsée, et y s'intin réponde : « dans le temps, les vieux ne se lavaient pas tous les jours » ! Eh ouais, mé jins, o zavé bin lu !

Mi j'i éro artourné « ché viu d'avant ché pon ché viu d'asteur ».

Tout cha pou dir (co in kou) ke ch'mond y évolue, mé ki fo pas tout mélanger, kin peut avincher sans tout effacer.

Ché vrai ke l'mond' ya kangé à ene vitess' trop rapid' et j'cro bin ek ché cha kin é intrin ed s'rind' compte, nou zaut' – kin é ché pu grands fautifs – et ché jonn'.

Kan j'vo ché gosses d'asteur, eh bin, j'su fière, et j'cro ek'cha va s'aringer. J'en' sus pa si sott' ed'croir' kin va fair' machine arrière, mais j'em'prin à pinser kin est bin parti pou granmin, granmin, granmin, ralentir. Y a ka vir tou cheu ki fabrik't leu savon, leu dintifris', tou cheu ki en'prind' pu l'avion, ki roul't à vélo... Y n'a granmin k'ion compri ek nou terre in prind' gran soin.

In m'a toudis di ek j'éto utopiste ! Bin vo miu cha ek d'et' trist' !

Avant ed'finir min laïus, j'voudro vou raconter kemin k'mon onc' Michel y m'a artourné min gardin et pi em'cervelle pa l'mêm' occasion. J'avo akaté ene grand' maison aveuc in grand gardin k'iéto à l'abandon. Em' m'onc' y a été contin ed' artourner ch'el' terre pou inl'ver ché pissenlits. A chac' kou, j'el raviso, y tapo ch'el racin' par terre, cha féjo ker ch'el' terre et pi y meto ch'pissenlit din in sac. Cha m'simblo drol', y véyo qu'el raviso et y 'di : « té do jamais oublier ki y a kekcoz k'yar pouss' jamais su' l'terre, ché l'terr »

Tou cha pou dir' ke j'va finir em' bafoull' ichi et qu' j'su bin contint' d'améner em' pitit' part à ech' grand ouvrach ed'nou temps, « l'environnement » ou cor, la nature et le bons sens.

Adé mé jins, au plaisir !